



# Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :

Tir Yimym

tir\_yimym

tir yimym

TAPAK 8

One nation, one election ya democracy raksatsütsü atema lir

Tesüiba China national football team coach Li Tie küm 20 tepuokdak ayutsü

VOL. XXII ISSUE NO. 65 (ADOK 65)

DIMAPUR

KÜPTOKNÜ (SATURDAY)

LUCHII (DECEMBER) 14, 2024

₹ 5.00

## ALT-i Mangkolemba nung fire station lapoktsü akhanger

**Dimapur, December 13, 2024 (TYO):** Ao Lanur Telongjem (ALT)-i state sorkari dang Mangkolemba Sub-division nung fire station ka tekaratiba nung amenoktsü takhangba agütsüogo.

December 8 nü Mangkolemba jila nung kitsükkirong lendong tulu ka nung ki pungu, dokan ana aser godowns rongdokba atema temulung shiranger. Iba tatalokba ajanga sorkari küm aika Mangkolemba sub-division senzüka yutsüba kuli agütsür ta ALT-i ashi.

"Mokokchung district nung Mangkolemba ya sub-division tejentiba rongnung ka aser tongtipang sub-division ka dang masü saka iba ya zükong asem

indang Headquarter lir. Mangkolemba nung fire brigade ka ali asübo tawa kitsükkirong lendong yamai tulu matalokla anungji sorkari tangsa iba jila nung fire station ka amenoktsü akhanger" ta ALT Convener Imnaonen Pongen aser Co-convener K. Tia Longchar nati sangdong ka nung ashi.

Mangkolemba Sub-division nung tanga tenügdakbatem dak alia fire-brigade ka alitsüla anungji sorkari mapang shitak nung mapa inyaktü imlar ta ALT-isa ashi.

ALT-isa bangdakpurtem dang kitsükkirong lendong nung takoksa ajurua alirtem nem senotsü teyari agütsütsü ayongzüküogo.

## NHPC project nung CAPF lezmüksüba aitsür

**Itanagar, December 12, 2024 (Agencies):** Arunachal Pradesh kübok Siang District nung Central Armed Police Force (CAPF) mapa lezmüksüba aitsür ta Northeast Human Rights (NEHR)-i metetdaksüogo.

NHPC indang 11,000 MW Siang Upper Multipurpose Project (SUMP) asoshi Pre-Feasibility Report (PFR) renem dang yariteptsü atema CAPF mapa lezmükja lir.

Iba atema NEHR-i Arunachal Pradesh Chief Secretary aser Home Commissioner na dangi züluba shiditem nung lisopur kintem nem amokmerenba aser temeten magütsüba shiogo.

Parnokisa CAPF agientsü aser nübortem den timi olemtepa haihaura akatsü ayongzüküogo.

NEHR-isa Free, Prior and Informed Consent (FPIC) tangatetba sülen anidaksü aser SUMP project meyipa repringshitsü ayongzük.

Sorkar aser iba mapatong ajanga kongshirtem tsüngda tiyongtsü nung mapa inyaktü atema dedicated task force ka tentetsüla t NEHR-isa ashi.

11,000 MW SUMP ajanga parnok nem timtem bentsür arutsü, libaliro nung kongshitsü aser lipoküm raksatsü ta iba tesem

nung alirtem tsüba lungkak aiter. Iba mapatong ajanga nisung 100,000 shi dak kongshitsü.

November 29, 2024 nü Chief Minister Pema Khandu menden ser senden ka amendang iba mapatong tekaraba nung inyaka aotsü bangjemtepa liasü.

Iba senden nung Siang aser Upper Siang district tem nungi minister aser MLA tem aden.

Mongulbarnü Siang Deputy Commissioner P N Thungon-i Riew aser Parong yimtsüngtem nung CAPF sepaitem mapa lezmüksütsü renemer ta shia liasü.

"Iba mapatong ya linük asoshi kanga tongtipang ta angateta nübor 70-80% shi kati inyaktü mulunga agizüker saka telok kati memulunger. PFR renemtsüla aser iba nung ita 3-4 ka agitsü. Parnoki iba tesem nung tzünokdang yanglutsü atema drilling süa bushidangtsü" ta deputy commissioner Thungon-i ashi.

"Nisung kari iba mapa inyaktü memulungra sorkari inyaktüsüa meratem agitsü. Iba ya yimdaklirtem anema masü saka parnok aser survey inyaktertem kümzüka ayutsü atema lir" ta paisa ashi.

Riew aser Parong nung alirtemi ita ka jungnüa surveyor tem iba tesemi marudaksüi noktanga arur.

## Ochimashi anema rarar Kezhokhoto Savi süogo

**Dimapur, December 13, 2024 (TYO):** Nagaland nung küm aika ochimashi anema noktaka arur Kezhokhoto Savi tanü alima nungi pilaogo.

Kezhokhoto Savi ya advocate ka aser Kohima Law College nung assistant professor liasü.

Pa mapang talangka shiranga arur Kohima nung nija mozü ki ka nung asü. Pa tasünü tashi Savi ya Nagaland Voluntary Consumer Organisation (NVCO) nung president aser Against Corruption and Unabated Taxation (ACAUT) Nagaland legal cell nung convenor ama inyaka aruogo.

NVCO nung president ka ama Savi-i Nagaland nung consumer awareness campaigns agiba nung pai tongti shilem agia liasü. Pai kanga merangba ajanga Nagaland nung consumer education aser enforcement of rights jenjang tajungba kümogo. Savi-isa Consumer Protection atema National Award ka nguogo.

Asür Kezhokhoto Savi mang Honibarnep 9:00 ako nung Lower Chandmari nung par kidang nungi Ze-Naki ground, Jakhama-i bener aotsü aser idakji anüngdang 12:00 ako nung pa den asüpila sentep sentong agitsü.

## Ayushman Bharat kübok ashikülak ken o lakh 3.42 putet

**New Delhi, December 13, 2024 (Agencies):** Centre sorkari tenzükba health insurance scheme Ayushman Bharat Pradhan Mantri Jan Arogya Yojana (AB-PMJAY) kübok ashikülak ken o lakh 3.42 putetogo ta Hokolbarnü Parliament nung metetdaksü.

Congress MP Murari Lal Meena-i asüngdangba ka langzüdang Union Health Ministry-i nüngdak maliba surgeries dena ashikülak ken o 342,988 tashi putetogo ta ashi.

2018 küm scheme tenzükba sülen taküm December 11 tashi nung ashikülak ken o 342,988 putetogo. Iba nungi ken o 286,771 tashi medical management aser ken o 56,217 surgical management indang lir.

Iba scheme kübok nüngtugu mozükitem nung nüngdak maliba angioplasty aser tanga

surgeries agiba ajanga nisungtem asüba osang angazük asü masü ta Lok Sabha MP Meena-i Centre dang asüngdang.

Taoba ita Ahmedabad nung amenoka aliba Khyati Multispecialty Hospital nung AB-PMJAY kübok nisung ana angioplasty procedures agiba sülen asü. Iba tatalokba bushisüngdang asüdang nüngdak maliba nung angioplasty agiba bushitet.

Tan hopta Gujarat health department-i AB-PMJAY scheme meyipa repringshiba sülen nika mozü ki 5 nung iba scheme meinyaktü tenokdangba agütsüogo.

AB-PMJAY kübok beneficiary temi empanelled hospitals nung secondary- and tertiary-level healthcare atema Rs 5 lakh tashi teyari angur.

Iba scheme kübok sensaker

kibong crore 12.3 shi dena lir aser taküm nungi iba scheme nung arishi küm 70 ser temapur ajak adener.

November 30, 2024 tashi nung iba scheme kübok Rs 1.16 lakh crore jungnüa indang 8.39 crore hospital admissions asütsü melaogo.

Ashikülakba aser tim mesü amshiba ken o tem bushisüngdangtsü aser temerenshi agütsütsü atema National Anti-Fraud Unit (NAFU) tenteta lir. NAFU ya National Health Authority (NHA) kübok amenoka lir.

NAFU-i state anti-fraud units (SAFU) den amalitepa maparen inyaker aser ashikülak aser tim masüba ken o tem asoshi temerenshi agütsür.

AB-PMJAY kübok tang tashi nung hospitals 29,929 tashi empanelled süa lir aser iba nung nija mozü 13,222 dena lir.

## Nagaland nem Disaster Risk Reduction atema Excellence Award agütsü



December 12, 2024 nü Taj Vivanta, Dwarka, New Delhi nung Disaster Management Authority (NSDMA), Home Department, Joint Chief Executive Officer Johnny Ruangmei-i Union Minister of State for Defence, Sanjay Seth ket nungi Award of Excellence and Innovation agizükba angur.

**Kohima, December 13, 2024 (TYO):** International Institute of Security and Safety Management (IISSM)-i Nagaland state nem Disaster Risk Reduction (DRR) atema Award of Excellence and Innovation agütsüogo.

December 12 nü Taj Vivanta, Dwarka, New Delhi nung 34 buba IISSM Annual Global Conclave alidang iba sempet agütsü.

Nagaland nung disaster risk reduction (DRR) maparen kanga meranga inyakba atema National Institute of Disaster Management (NIDM)-i tenüng agütsüba sülen IISSM-i sempet

agütsüogo.

"Nagaland nung DRR mapa balala inyakba nung disaster response atema senotsü lezmüksüba, hazard preparedness tajung renemba aser disaster mitigation strategies atema külemi yaritepa inyakba dena lir" ta Nagaland State Disaster Management Authority (NSDMA) Commissioner & Secretary Lhouchalie Viya-i ashi.

Iba sempet ya Minister of State for Defence, Government of India Sanjay Seth-i agütsü aser pai Nagaland nem tenüngsang agütsü.

"Nagaland-i tsüngsang-

mongpu melenshiba aser alima lendong balala nungi nübortem kümzüka ayutsü meranga inyakba atema tenüngsang agütsür. Iba ajanga sorkari nübor kümzüka ayutsü tenangzükba agia inyakba sayur" ta Sanjay Seth-i ashi.

Nagaland sorkar tenüng nung Nagaland State Disaster Management Authority (NSDMA) Joint Chief Executive Officer Johnny Ruangmei dena ketdangsurtemi iba sempet agizük.

Taküm Conclave ya "Total Loss Prevention - Risk to Resilience" omen nung ajemdaker agi.

## Note Grid School of Music Mkg takoker nem tenüngsang agütsüba sentong agi



Tetushi tejaoker MMC councilor, Wapang Kichu den Note Grid School of Music, Mokokchung nungi takok angurtem, tezüngdakpurtem aser school achayangertem külemi tangokba noksa nung angur. Mokokchung, 13th December, 2024.

**Mokokchung, Dec. 13, 2024 (TYO):** Note Grid School of Music, Mokokchung pur Christmas jili den repsema takoker nem tenüngsang agütsüba sentong ka December 13, 2024 nü yangi Ao Temulung Kilem, Mokokchung town nung meraketa ayongzüka liogo.

Sentong nung tetushi tejaoker, Mokokchung Municipal Council Councilor, Wapang Kichu-i mapang tatsüka agia jembidang, asenok ajak ya takoker kaka mekümet, saka takokertemia 'kokerji ta sür masükümi tali ajemalutsüla', ta ashi.

Kentenmenü ya sempet aser iba yabo tasodang nungi aketba ka lir. Tangar kadi gitar junga temteter ta sür naia temtetba mapa ka masü.

Nisung shia sempet balala moaja lir, nai ken junga metetetaka kongki junga temtetsü akok, yamaji nai kongki junga metemetetaka ken junga tentetsü akok. Ibai sempet lir, anungji, asenoki kechisarena nung Tsüngrem mezüng südaktsüra tanüngbaji jungatoksü, ta paisa ayongzüka liasü.

Iba sentong nung Note Grid Children Choir-i ken ana aten, Sanomaya-i violin solo ka, Rongpangnok-i drum solo ka, Akumseni ken solo ka, Nokinwala-i piano piece ka, Jongshiwapang shiba ANCSU Meet 2024 nung best guitarist agizük, paia gitar solo ka ta yangji iba school nung azünger lenla balala nungi shilem agiba ajanga tesentepertem

tzüratemdaktsü.

Sentong nung Note Grid School of Music Mokokchung Administrator, Senti Imchen menden liasü. Tsüraburtem tenüng nung Amenla aser tesayurtem tenüng nung violin sayur, Jongpogtoshi nadi tepela o den tayongzüka tulu bener arua ayongzüka. Note Grid School of Music aser yangji azüngertem atema Mokokchung Town Baptist Arogo Assoc. Pastor, Monglier-i temoatsü meshia sarasademtsü.

Note Grid School of Music Mokokchung nung course balala agir grade balala nung parnok 24-i takokba kulikaket agizük aser kulikaket ji Councillor, Wapang Kichu ajanga lema agütsü.

## DC Mokokchung ajanga metetdaksür

**Dimapur, Luchii/December 13 (TYO):** Tuli town leni aolen Asetkong – Tsusanra road nung 27.000 KM chainage nung aliba Longpong Bridge yanglushiba maparen renemnung tang nungi tenzüka iba lenmang nung gari tabu ajak senzütsü melar, ta

Deputy Commissioner, Mokokchung, Thsuvisie Phoji-i sangdong ka nung metetdaksü. Ibai Office of the Executive Engineer, PWD (R&B), Mokokchung Division nungi osang aruba nung ajemdaker sangdonger, ta paisa ashi.

## IPFC, IDAN ajanga Intellectual Property Rights awareness sentong ayongzüka

**Dimapur, Luchii/December 13 (TYO):** Investment and Development Authority of Nagaland (IDAN) indang Intellectual Property Facilitation Centre (IPFC) ajanga Nagaland Science and Technology Council (NASTEC) aser Educentre School of Business (ESB) den lungjemer Innovation and Incubation Centre, IDAN, Kohima nung December 12, 2024 nü One Day Awareness Program on Intellectual Property Rights (IPR) ayongzüka liasü.

Iba sentong tenzüka I. Changsang, NCS, Under Secretary, Nagaland ajanga jembidang Intellectual Property Facilitation Centre ya kanga tongtipang lir ta ashi. Paisa IDAN IPFC ajanga NASTEC aser ESB den lungjemer Nagaland nung aliba entrepreneurs nem services agütsütsü nükjidong lir ta ashi. Changsang-isa iba sentong nung adenertem dang iba sapang amshia pei business aintsü aser kumzüka ayutsü ayongzüka.

Iba sentong nung shisalen sayur Kekuniel Ltu, Scientist 'B', NASTEC ajanga "Intellectual Property Rights

and its Components" onük nung ajemdaker jemi, Gihukali Chishi, Technical In-Charge, Patent Information Centre – NASTEC ajanga "Patents, Trademarks, Designs, and Trade Secrets" indang jemi aser Ketoulhoutuo-u Rame, Intellectual Property Rights Legal Consultant, IPFC ajanga "Infringement and Opposition" indang onük nung jembia liasü.

Iba sentong nung entrepreneurs, startups aser entrepreneurs akumtsü jangrartem aden aser parnok nem Intellectual Property Rights (IPR) tabu ajunga registration services atema osang balala agütsü.

Iba sentong ya IPFC ajanga Nagaland nung entrepreneurs, startups aser innovators yaritsü meranga inyakba nung shilem ka lir, kong business tem commercialize atema nungdakba teyari agütsür.

Iba sentong nung IPFC nungi Nikhaholi Sumi menden liasü, Fiona Haralu, Operations Manager, Educentre ajanga pela agizükba o jemi aser Rashna Thapa, Career Counsellor, Educentre ajanga melepzüng o jembia liasü.

## Dimapur Night Carnival 2024 tenzükokogo



**Dimapur, Luchii/December 13 (TYO):** Dimapur District Sports Council (DDSC) Stadium, Golaghat Road nung December 12, 2024 nikongdang Dimapur Night Carnival 2024 tenzükokogo.

Iba carnival ya Dimapur Municipal Council, Dimapur Chamber of Commerce & Industries aser District Administration, Dimapur lungjemer ayongzüka aser December 12 nungi 16, 2024 anogotem nikongdang 5:00 ako nungi 10:00 ako tashi alitsü.

Iba carnival tenzüka sentong ya Matsung Ozukum lenisüba nung ahi, kong Minister, Tourism & Higher Education, Temjen Imna Along sentong akhumtong ka ama dena liasü.

Minister Imna Along-i ribbon mejepdanga sentong tenzüka aser Pastor Kenei Kiso-i sarasadema liasü.

Deputy Commissioner, Dimapur aser Chairman, Dimapur Night Carnival, Dr. Tinojongshi Chang ajanga pela agizükba o jembidang iba sentong ajanga sobaliba, entrepreneurship aser tourism temaba jenjangi ajungketba indang tongmelang agi rasaa ashi.

District Administration ajanga lokti tentet balala den lungjemer iba carnival küm 12 buba ayongzüktetba atema pelaba lemsatepa liasü.

Taküm iba carnival ya tesüba mapang dang nungi khenyongi balaka lir, kechiaser Dimapur Municipal Council indang councillor ajak adenba ajanga balaka kumdaktsür, shirnoki iba sentong tajungba kumdaktsütsü asoshi lungjemer inyak, ta Chang-i ashi.

Iba sentong tenzüker tejangraba tali akumba indang pai ashi aser mezüng yongi lanurtem aser entrepreneurs tem ajungmesotsü aser yaritsü asoshi tenzüka ta ashi.

Kasa mapang Dimapur nung alir tanur-tain ajak

adenshia kinunger aser medemertem den jangratema amungtsü iba sentong nükjidong lir ta pai ashi.

Sentong akhumtong Temjen Imna Along-i jembidang iba amala sentong yagi telungjem tali adokdaksür aser Dimapur nung kin balala aliba tali tejangjaba nung sayur ta ashi.

Deputy Commissioner, Dimapur Municipal Council (DMC), Dimapur Chamber of Commerce and Industry (DCCI) aser police densema lokti tentet balalai iba sentong ayongzüktetba asoshi pelaba lemsatepa liasü.

Dimapur ya Nagaland indang rongsenketzüng tesem ka ama tongti shilem agir aser iba yimi yagi state ainba nung kongshir, ta pai ashi.

Yimti nung timtem balala ajurur, aser Dimapur terenlok nung tetsükdaktsü agüja ozüng alema senotsü saruba aser mapa meshidak inyakba tebilemstütem kaktetsü asoshi ajak lungjemer inyaktsü nungdaker, ta Minister Along-i ashi.

Kisama nung 25 buba Hornbill Festival takok ngua mungtetba nunga Dimapur yimti ketdangsur aser police shilem tulu lir, ta pai tenüngsang

agütsü aser DMC dang municipal mapa aser ano Dimapur nübur ajungtsü asoshi rangloker inyaktsü ajungmesoa liasü.

Inner Line Permit (ILP) dak sendakba nung Naga nung masüba nüburtemi shisabulua bilemba indang angatetjema jembidang, yimti nung mapang talangla alir nem timtem magütsü illegal immigration azioktsü nükjidong nung sorkari iba mera ya agi, ta Minister Temjen Imna Along-i ashi.

Dimapur lenla ajak nung terenlok alitsü atema pai nüburtem dang lungjemer inyaktsü ajungshia liasü.

Iba sentong tembangba sülen pai stall tem sendanga liasü, kong teka mapa, chiyongtsü aser südoksenemdak tesemtem lapoka lir.

Iba sentong nung Ying P aser Temjenchuba Ozukum nati ken tena liasü.

Dimapur Night Carnival nungya stalls 125 dak tema lapoka lir aser local artists aser guest artists temi mapang shia kenten menüba nung shilem agir aser asaya balala, photo booth, culinary delights aser teka agi yangluba osettsüset balala ayoker.

## ANCSU-i Kezhokhoto Savi asükhu lemsatep

**Dimapur, Luchii/December 13 (TYO):** All Nagaland College Students' Union (ANCSU) office sangdong ka nung, taoba Tribunal General (1999-2000), Nagaland Voluntary Consumers' Organization (NVCO) tir, ACAUT Nagaland Legal Cell convener aser Kohima Law College nung Assistant Professor, Kezhokhoto Savi anojungi December 13, 2024 nü asüba atema mangyim-jashi lemsateper, ta metetdaksü.

Professor Savi ya educationits tejangja aser nübur atsür arutetba lenir ka liasü, shibai arishi tepiyong nübur tenzüka nung takum bendanga agütsür ajemalua aser ochi nung tenzüka.

Asen state aser tesem balala nung shisaliok ajungtsü mechi pai shilem tulu agiba atema pelar aser akhum agütsür, ta ANCSU ajanga ashi. Pai anibelen mesasai kaketshir aser lokti temaba jenjangi ajungkettsü asoshi inyakba ya teti menungra bilemtetsü. Kaketshirtem shisalak tsütsü temelenshi putu kati ayaoka aiba mapang pa ama temulung lemtetba educationist aser lenir ka asüba ya kanga jangja metettsü.

Asür Kezhokhoto Savi-i yutsür aoba kinungertem den asükhu lemsateper aser asür tanüla teti tatem maka tesunep nung anisüngzükjangma, ta ANCSU sangdong ajangasa ashi.



New Delhi, December 13, 2024: 2001 kum kiralongraratemi Parliament amakba sülen kum 23 ajungba anogomong nung Hokolbarnü Rajya Sabha nung opposition lenir, Mallikarjun Kharge-i Parliament amakdang asürtem nem akhüm agütsüdang tangokba noksa nung angur.

### One nation, one election ya democracy raksatsütsü atema lir: Raut

**Mumbai, December 13 (Agencies):** Hokolbarnü Shiv Sena (UBT) lenir, Sanjay Raut-i, "one nation, one election" ya democracy raksatsütsü atema benokba BJP asalentong lir; parnok tajangzük angutsü atema BJP-i iba bill benoker, ta ashi.

Brihostibarnü Ato kilonser, Narendra Modi leniba nung Union Cabinet-i linük nung Lok Sabha aser state assembly elections ajak mapang ka nung dang külemi agitsü atema benokba constitutional amendment bill agizükogo.

Union Cabinet-i draft legislations ana agizükogo aser item rongnung Union territories asem legislative assemblies den sendaktepsü aser Constitution amendment bill nung

inoksemsü atema ozüngtem yanglushitsü asoshi simple bill ka densema lir.

Constitutional amendment bill ji agizüka ozüng kümra Lok Sabha aser state legislative assembly elections ajak külemi agitsü atema ozüngtem latettsü.

Mumbai nung osangbenertem den jembidang Raut-i, BJP-i merumerua parnok tebilemba ataloktsü atema "one nation, one election" benoker, ta ashi.

"One nation, one election ya democracy meshimeshia raksatsütsü atema benokba asalentong lir," ta Raut-isa metetdaksü.

India ya federal state system ka lir, ta shia Sena (UBT) leniri, komaser linük nung election

ajak külemi agitettsü, kechiyong state shia nung loktiliba densema lenla ajak khenyongi balala lir, ta ashi.

State dak sendakba onüktem aser linük dak sendakba onüktemji khenyongi balala, aser iba sasep nungji nüburtemi vote agütsüsüla, ta pai ashi.

Maharashtra state sorkar aija pai, "Nenoki tang tashi BMC (Brihanmumbai Municipal Corporation) election-a ayongzüka magiteter. Tamakok angutsü tsübuba agi nenoki civic body election magir," ta ashi.

Linük temzüng aser federal inyakyim anema inyakertem dang linüki tai madokba tatalokba aika lir, ta paisa metetdaksü.

### Lok Sabha nung tang mezüng jembidang Priyanka Gandhi-i BJP aitsü

**New Delhi, December 13 (Agencies):** Hokolbarnü Lok Sabha nung tang mezüng jembidang Wayanad nungi Congress MP, Priyanka Gandhi-i BJP sashia aitsü.

Hokolbarnü Parliament nung linük temzüng onük nung o entepba nung shilem agidang Priyanka-i, Lok Sabha election nung takok junga angu asübo BJP-i linük temzüng melenshitsü atema maparen tenzükadoker lila, ta ashi.

Priyanka Gandhi-i, "Linük temzüng ajanga ochi temeden metettsü aser sorkar anema ola adoktsü atema nüburtem nem tashi agütsür. Asen linük temzüng ajanga nüburtem kümzük. Ajisüaka tia maka, ruling party-i iba jong raksatsütsü merangogo," ta ashi.

Laisa, "Parnoki 'linük temzüng' ta ayimden, kechiyong iba linük nung nüburtemi linük temzüng taküm lidaktsütsü, ta meteta dang lir," ta ashi.

Lok Sabha nung iba onük nung o entepba mezüng anogo nung Union Minister Rajnath Singh-i Congres aija liasü.

Rajnath-i, "Congress-i aiben linük temzüng aser tanela mezüngmeshiogo. Rejutem dak nija tashi alibaji parnoki magizükteter. Parnoki linük temzüng nung tongti tangatetbatem raksatsütsü atema mapang ajak nung merangogo," ta aija liasü.

Industrialist Gautam Adani tenüng tetshia Priyanka Gandhi-i, sorkari Adani tajangzük ngudaktsü atema inyaker ta aikati bilemer, ta ashi.

"Nisung ka kümzüktsü atema India nunger crore 142 sendokbaji iba linüki repranga dang atadar. Business ajak, sen aser rongsen ajak nisung ka ket nung dang agütsür. Ports nungi tenzüka airports tashi aser mines den public-sector company ajak nisung ka nem dang agütsür," ta laisa metetdaksü.

Minute 32 shi jembidang laisa linük nung mezüng Ato kilonser Jawaharlal Nehru aser taoba mapang Ato kilonser Indira Gandhi nungeri Public Sector Undertakings aika amenokba densema linük yangertsü atema mapa jenti inyakba metetdaksü. (Maneni tapak 8 nung...)

### Aluyimertem lenmang nung longkak maitdaksütsüla: SC



December 13, 2024 nü Patiala district kübok Shambu arrtsü nung Punjab nung aluyimertem lenir, Sarwan Singh Pandher-i osangbenertem den jembidang tangokba noksa nung angur. Aluyimertemi sorkar nem MSP legal guarantee densema takhangba aika agüja longkak aiter.

**New Delhi, Luchii/ December 13 (Agencies):** Hokolbarnü Supreme Court-i Punjab aser Haryana arrtsülen Shambhu nung longkak aiter aluyimertem dang 'Gandhi yimya' nung longkak aitsü mepishi aser court-i shima aliba high-powered committee dang aluyimertem dang khenpiga longkak aitba anena atatsü mepishiang mesüra gari lenmang nungi aienshir tanga tesem nung ang longkak aitsü tuyuang, ta metetdaksü.

Supreme Court bench-i, "Aluyimertemi tashiyim amshia masü saka tesünep nung longkak aitsüla. Parnoki Gandhi yimya nung longkak aitsüla, kechiyong parnok takhangba onüktemji reprangshidar," ta metetdaksü.

"Committee teinyaktsü tongti mapaji aluyimertem dang longkak aitba tesem melenshitsü

mesüra sorkari telemtetba magi tashi longkak aitba khenpiga atema anena alitsü atema mepishitsüla," ta bench-isa metetdaksü. September 2 nü Supreme Court-i committee ya tentetja liasü.

Aluyimertem den tiyongtsü ia jembitsü atema taoba mapang Punjab & Haryana High Court nung judge, Justice Nawab Singh tongti shima committee ya tentetja liasü.

Justices- Surya Kant aser Ujjal Bhuyan nati akümba bench-isa tesüiba anogo 17 tashi lumia longkak aiter Punjab nungi aluyimertem lenir, Jagjit Singh Dallewal nem tangsa medical teyari agüjang, ta tuyu.

Bench-isa Solicitor General Tushar Mehta aser Punjab Advocate General Gurminder Singh na danga Dallewal lumia longkak aitba nokdangtsü atema tashiyim tamshi, ta tuyu.

### Canada nung India nunger kaketshir asem tepset

**New Delhi, December 13 (Agencies):** Taoba hopta Canada nung India nunger kaketshir asem tepsetba sülen sorkari Canada ketdangsertem den iba tebilemtsü onük lemsatepogo, ta Hokolbarnü Ministry of External Affairs (MEA)-i metetdaksü.

MEA otongdar, Randhir Jaiswal-i, item tatalokba ya tejashitsüka lir, ta shia takoksa angur kibongtem den mangyimba osang lemsatep.

Ottawa nung Indian High Commission aser Toronto o

Vancouver na nung Indian consulates-i iba dak sendakba nung amalitepa inyakdar, ta Jaiswal-i metetdaksü.

Item tatalokba jungjunga bushisüngdangtsü atema Canada nung Indian missions-i Canada nunger ketdangsertem den tongtepratepdar, ta pai ashi.

"Canada nung tesempa agi ozüng alema inyakba mapatem kanga bulua akümba ajanga tensa tamajungba akümer; iba dak sendakba nung onoki India sensotem aser kaketshirtem dang kanga

kümdanga alitsü tekümdangtsü metetdaksüogo," ta Jaiswal-i metetdaksü.

Tang Canada nung azünger India nunger kaketshir 400,000 dak tali lir.

Canada nung Indian high commission-i visa magütsür, ta osang prokba dak sendakba nung tasüngdangba ka langzüdang Jaiswal-i, "Onoki media report ajanga iba osang metetogo. Iba ya Canada media-i India tenüng menüktsütsü atema inyakba tatishitsü rongnung ka lir," ta metetdaksü.



December 13, 2024 nü Prayagraj nung Mahakumbh benjung dak sendakba nung Uttar Pradesh Angh, Anandiben Patel, Ato kilonser Narendra Modi aser Uttar Pradesh Chief Minister Yogi Adityanth nungeri Ganga aser Yamuna ayong na ajurutepba tesem nung külemküjadang tangokba noksa nung angur.



## TIR YIMYIM YIMOBILEM (EDITORIAL)

DIMAPUR

KÜPTOKNÜ

LUCHII 14, 2024

### Opposition nem mapang peria agüjang

- P Tiamongba Aier

India nung küm 70 tashi Parliament inyaksangshia arudang tan Winter Session nung kodanga matalokdangba ka atalokogo. Iba ya Opposition ajungai Rajya Sabha Chairman anema motion ka benokba lir. Opposition nübo peria meliaka aser inyakyim nunga metokmeperitem liaka iba mapa inyakba ajanga sorkar aser opposition tsüngda tesentaktep kanga mejungi akümba sayur. Taoba session nunga RS Chairman Jagdeep Dhankhar anema motion ka benoktsü tebilemba liasü saka meinyak dang süi saka tan winter session nungbo ibaji mapa küma inyakogo. Dhankhar-i külen tsütsü dang shir inyaksangshir ta tai tonglokja Opposition-i iba motion benoka liasü. Parliament nung opposition aser ruling tsüngda tekong merangtepba ya teti ajurua arur aser iba ajanga session junga magiteter. Ajisüaka Rajya Sabha nung Chairman ka anema iba amai inyakba ya tang mezüng lir. Sorkari Opposition den tangatettep kati arutsü atema jembioogo saka Opposition ajunga longjemer motion benok asü nung iba mera ya kanga junga shisadangtsü nungdaker ama ajiteter. Rajya Sabha nung presiding officers dak temulung malemba ya tesüiba nung balaka adokba mali saka Lok Sabha nungbo Speaker G.V. Mavalankar (1954), Speaker Hukum Singh (1966), aser Speaker Balram Jakhar (1987) nunger anema motions benoka liasü. Parliament nung Ruling aser Opposition ajak dena lir aser tanü party balala lokteper sorkar akümba putu nung telok karibo tiyongtsü nung dang alir. Item teloktemi Ruling mesüra Opposition den tepila kasa dang ayur ta ashir aser onüktem nung ajemdaker ka mesüra ka pusemer. Ajisüaka kodang party ka ket nung nübo peria majority nung lidir, parnok teloktep nung aden nunga bench nung tashi peria aliba ajanga tensa melenshir. Iba ama Parliament nung telok ajak nungi parliamentary managers-i tongtipang shilem agir ser parnok ajurutepa ken o tem angatetteptsü aser külemi mulungba yim bushiteper. Anogo 12 tejakdang iba amai olemtep ka liogo aser sorkar o Opposition-i Lok Sabha aser Rajya Sabha nung Constitution atema olemteptsü mulungtepa liasü. Iba senden sülen Opposition-i lungkak aitba anena liasü saka tangbo Chairman Dhankhar anema motion benokba ajanga ruling o Opposition tsüngda tangatattep mali ama kümogo. Tesüiba nung sorkar aser Opposition tsüngda iba amai tekong merangtepa arudang parnok külemi ser tiyongtsü ka nung ajuruteptsü lenmangtem bushitepa aruogo. Sorkar atema parliamentary managers-i House anaprong nung session tiptema agitsü aser legislative agenda tejakleni bener aotsü atema tongti shilem agia arur. Opposition-ia Parliament session tiptema magidaktsüi tenokdangba dang agüja maotsüla kechiyong kodang yamaji südir nübortem dang Parliament ya mapa meinyakba reju ka ama dang sayur. Parliament nung House anaprong nung meinprongba aser tenokdangba agütsüba inyakyim ya 1980s tom ka nungi ataloka arur. Lennirtemi aiben iba amai mataloktsü atema merangaka aser bangzüngtem renemaka, Parliament ajurutepa amen shia iba khuret ajurupet ajurur. Anungji tarutsü nung iba amai majurutsü atema British aser Canadian Parliament tem nung benshiba ama Opposition nem anogo kar balaka lemezütsütsüla. Kechiyong shin o ka nung shia aliba ama opposition-i kechi shidir shitetsü aser sorkari kechi inyaknür inyaktetsü.

## OLEMSABANG

### Naga tenem nung Rev. Dr. E. W. Clark-i mezüng tenzükba Arogo otsü

Molungkimong Literature Board.

(Yashi adok nungi...)

1986 ABAM Mongdangsanger-i report komala ka 'akizüka ayu' aser 'telemtetba' kechi aki, aji ken reprangshidi. 1981-1986 ABAM Special Committee Report - "Committee-i osang bener aruba ama mungdang-i agizüka ayu aser iba ken-o nung Mungdang-i kecha shilem (Responsible) magitsu ta lemtet". Tetezu 'Committee Report' aser 'Mungdang Telemtetba' ji ajebteba masü saka bendanga benshitsüla. 1986 reportji one sided dang masü, mabensa aika lir (Tat. agi - 1986 report nung Molungkimong nung tamanger member tangtangogo ta sayutsü atema tenüng pezü shia lir saka tanüngba indang shia mali). Aser ano iba report nung factual errors aika lir (Tat. agi - Molungyimsen Arogo 19 August, 1894 anepdang disband sür September 23, 1894 anogo Arogo tenzükshiba indang, 'ghonda ishika disband asüba' ta lir). Anungji ya metettsü tongtipang - 1986 ABAM Mungdang nung, 1981-1986 ABAM Special Committee Report ji tatsü-talang mapang akia o-lemtep agir, mungdang sanger-i iba telemtetba (Resolution) agi - "TANGATETBA AGUTSÜR - Arogo otsü maparen dak sentakba nungi adokba ken-o case ama Mungdang mesüra kija Arogo shingaia mejembitsü, nungdakra zülua aliba kuli (documents) bushiteptsü akok" ... "Committee-i osang bener aruba ama Mungdangi agizüka ayu, aser iba ken-o nung Mungdangi kecha shilem (responsible) magitsu ta lemtet"

3. "Yim tasen akümdang Molungkimong nung tenzüka aliba Arogoji toktsür ao asü mesüra tamangertemji kar idakji yutsür yim tasen jagi ao" (Imchen, Rev. R. Tamsü. 'Rev. Dr. Clarki Tenzükba Arogo Otsu'. Tir Yimyim. 19-23 November, 2024).

Record, document aser tatalokba molungzüng otsü tejangja awajema mereprang, tai punüa, tasüngdangba agütsüba ya teim masü. October 24, 1876 nikongdang Molungkimong nungi kibong 15 (Baptiba züngsem 6 aser limapur 9) ao aser yim tasen aküm (Molungyimsen). Iba yimkumba anogoji, Naga tenem nung tanabuba Arogo tenzük (Molungyimsen Arogo). Molungyimsen yim akümdang, Molungkimong Arogoji bener ao ta kecha nunga zülua mali aser kecha nunga molungzüng otsüa mali, kechiyong arogoji bener senzüba oset masü. Tanabuba nung, parnok baptiba züngsem 6 yim taseni oer külen, Molungkimong Arogo nung Baptibapur züngsem 17 (Baptiba züngsem ka süadoker liasü), Supongmeren, Godhula aser tebotsü Lucy, Molungkimong nung anüng. Iba sülen Molungkimong Arogo aser Molungyimsen Arogo tsüngda, baptiba züngsem kar oli-aruli ta asüba otsü tejangja lir (Tat. agi - Imnanoknen Tzudir, Oct 24, 1876 nung Molungyimsen yim aser Arogo akümer den aden saka 1893 kum Molungkimong-i meyipa adok; Motongnuken Tzudir Oct 24, 1876 nung Molungyimsen yim aser Arogo akümer den maten saka tesülenbo Molungyimsen-i ayi). Anungji, 24 October 1876 yim taseni baptiba züngsem register bener oaka, baptiba züngsem teimba mao.

4. "Molungkimong nung Arogoji medangdangi aru asü maru?" (Imchen, Rev. R. Tamsü. 'Rev. Dr. Clarki Tenzükba Arogo Otsu'. Tir Yimyim. 19-23 November, 2024).

Molungkimong Arogoji noklangben-a tangtanga liaka, aji agi, Molungyimsen Arogoji Molungkimong nung 1872 nung tenzük ta mekümtettsü. Molungyimsen Arogo ji-a officially disband süa-a lir (August 19, 1894 nungi September 23, 1894 tashi). Naga lima nung yimmak tensa balala aser 'Indian Army Grouping' mapang Ao/Naga nunger Arogo kwi tangtanga lir? 'Arogo tangtang shia Arogo otsü kümzüng tenzükshitsü' mesura 'lokti tentet tangtang shia otsü kümzüng tenzükshitsü' ta asübaji iba lima shir otsü nung sa lir?

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



Longleng district nung Pongo Baptist Arogo tenzüker kum 75 ajungba Platinum Jubilee mung sentong December 12 nikongdang nungi tenzüko. Iba sentong nung tongti shilem agirtem rongnung CBCNEI tongti zülur Prof. Rev. Dr. Akheto Sema, NBCC tongti Zülur Rev. Dr. Zelhoo Keyho, Salulamang Baptist Church, Phom Baptist Christian Association nung Executive Secretary Wb. N Tialemba Phom, taoba PBCA Executive Secretary Rev. C. Amop Noklang, Rev. C. Allem, Missionary, aser UK nung YWAM Legal Missionary Dr. (Mrs) Julie Anjo nungertem lir. Iba Jubilee ya taoba NBCC tongti zülur aser taoba NPSC nung mendenbuba Rev. Dr L Anjo Keikung lenisüba nung mongdagi . Noksa nung Jubilee Choir-i ken atenba angur. Iba Jubilee sentong ya December 15, 2024 anogo nung tembangtsü. (Pongo, Longleng 13 December. 2024).

### Syria nung yimsüsürtemi Khristan yimsü akhümtsübutsu nangzük

**December 13, 2024:** Syria nung Khristantem tetsübu nung aliba tensa mapang ka nung Arogo lenirtemi Islamic telungpur telok ajurua jembio. Aleppo yimti nung aliba Franciscan Tenla kidang Arogo lenirtemi telungpur telok den senden ka ayongzuka menogo. Taoba hopta telungpur teloki Aleppo yimti agiba sülen anogo ishika lir Syria yimtiba agi aser tesüsa Bashar al-Assad yimsüsüba atsüngdok. Chaldean Bishop, Antoine Audo-i, senden kanga junga katetogo aser telungpur teloki Khristantem tekülem, sarasadem aser Arogoi lapokba school tem inyaksangshi akhümtsübutsu ta nangzükogo, ta metetdaksü. Paisa, Khristantem sobaliba aser sarasadem akhümtsübutsu ajanga telungpur teloktemi

onok nem tamang katetdaksüner, ta ashi. Bishop Antoine-isa akhidang nungi Arab Khristantem shilem tajung agia aruba aser Arab Muslim nungertem o Arab Khristantem na tsüngda tesendaktep tajung aliba metetdaksü. Khristantemji 'second-class' sensotem ama mezüngshitsüla, ta pai ashi. Osangbener den jembidang pai, "Ni parnok dang Arab Khristantem ama onok indang puti otsüji khenyongi balaka lir ta ashi. Ni parnok dang Arab Muslims aser Khristantem tsüngda tesendaktep junga aliba aser akhidang nungi Khristantem mapa tajung inyakba metetdaksü. Khristantemji second-class sensotem ama mezüngshitsüla saka ajak longjemer inyaksüla,

ta ni parnok dang shiogo. Parnoki item ajakji kanga nendaka anga," ta metetdaksü. Tawa melungtet telok kati Syria nung Khristantem atema yokba chiyungtsü aser mozü aika telungpur teloki rakzuka liasü. Kum 10 tejaklen Syria nung Khristan nütüing million 1.5 liasü saka kum aika civil war mapang nung Khristan nütüing kanga ajema kümer tangbo Khristan nütüing 300,000 dang kumogo. Bishop Audo-i, Aleppo yimti nung tensa süngjema kümdar aser Khristantem Khristmas benjunga amongtsü, ta metetdaksü. "Yimdong süa jajaba mesüra sentong tulu malitsü saka benjung mongpu nung onok Tenla ki semdangtsü atema ajak pelashishia jaoker," ta paisa metetdaksü.

### Virginia nung Forest Level Baptist Arogo Tenla ki mejungi raksa



December 9, 2024 aonung Virginia nung aliba Forest Level Baptist Church Tenla kidang langka apokba ajanga Tenla ki raksa aliba noksa nung angur.

**December 13, 2024:** Hombar aonung (December 9) Virginia nung kum 151 tejaklen asüba Tenla kidang langka apokba ajanga Tenla ki chirepba sülen pastor-i Khristantem dang par Arogo atema sarasademjang, ta mepishia metetdaksü. Forest Level Baptist Church nung pastor, Marcin Wilson-i,

"Tang onoki Khristantem dang ozü Arogo atema sarasademjang ta mepishir. Atangji onoki tanaben Tenla ki süshitsü atema sentong yangludat," ta metetdaksü. Bedford Fire Department nung ketdangsertemi ashiba agi, Hombar aonung 11:00 ako meta Bateman Bridge Road nung

aliba Tenla kidang langka apokba sülen mokozü tulu adok aser atem nung tapok tuluka paar liasü. Osangbener den jembidang Bedford Fire Marshal, Leo George-i, petrol gas leak asüba ajanga atem asüng aser mi adoka apok, ta metetdaksü. Mi adoka langka apokba ajanga akhidang asüba Tenla ki jara den külemi iba kiojen kanga mejungi raksa, ta George-i metetdaksü. "Iba lendong nung shinga meyruba atema onok pelar. Tenla kijibo tanaban yanglushitetsü. Onoki Arogo atema sarasademtsür," ta paisa shisem. Pastor Wilson-i, "Iba tatalokba atema onok jashir saka iba Arogoi inyakba mapa onoki maneni inyaksü. Onoki iba Tenla ki tanaben süshitsü aser maneni Tsüngremi Arogo nem nungloktsüba wadang inyaksü," ta metetdaksü.

## ANOGO ABEN TSÜNGREM DEN

### Temoatsütemi Anidaker

*Aser Kibuba ne Tsüngrem ola nenoki angadi süra, item temoatsü ajak nenok madaki arutsü aser nenok sülen anidaksü. Tazüing. 28:2.*

Kodang nai Tsüngrem den telungjem nung jajadir, nai temoatsü asüngdangtsü menüngdak. Pai na moatsüner! Nai meimlaba kar meimlaba sempet agi na peladaksüba ama, Tsüngremi Pa sempet nai meyimla mapang aser lemanng nungi agütsütsü. Tsüngrem temoatsü na mazüingi aliba mapang nung arur - mazüingi alidang telephone nung jangratemtsü tepelatsü osang arutsü akok mesüra osangtajung shiti agizüktsü akok. Aiben Tsüngrem temoatsüji yimjak nung ajaki ngua marur saka meyimlaba lemanng, atamata mapa nungi arur. Nai Tsüngrem temeim kanga nüngdakba mapang nung temoatsütem arur.

Tashi angaba nungi temoatsüji arur. Kodang nai Kibuba den jajadir nai masüngdangdangyongai Pai moatsür. Nai tashi angaba temoatsütem ne chirtem aser semchisemnurtem tonga arur. Solomon yimsüsüba mapang rongsen tulu madak pelaa liasü, saka pa temoatsü tuluba tesüba putu, tebu Dawidi Tsüngrem dang tashi angaba nungi anguba liasü. Tsüngremi Abraham dang pa tashi angaba nungi alima nung kibong ajak moatsütsü ta nangzük (Lipok 12:2-3).

Tsüngrem sempettemji odang agütsüba ama tagizük. Kodang nai meyimlaba temoatsü ka agizükdir, Pai maneni meimba atema tenüngsang agüjang aser ne sülen anidakba temoatsü metettsü renema liang!

### Pope Francis-i Palestine Tir Abbas ajuru



**December 13, 2024:** Tawa Pope Francis-i Israel-i Gaza amakba atema aitsüba sülen December 12 nü Vatican nung Pope-i Palestine Tir Mahmoud Abbas ajuruogo. Tamalena lenir ana aiben ajuruogo. Brihostibarnü minute 30 shi senden amendang tenati Gaza nung yimjung atema jembia liasü. Iba sülen Abbas-i Holy See Secretary of State, Cardinal Pietro Parolin aser Vatican nung foreign minister, Paul Richard Gallagher nata ajuru. "Gaza nung nüburtemi Arogo teyari kanga nüngdakba, yimjung nüngdakba, pua alirtem ajak chioktsü aser ken o jembiba ajanga linük ana tentettsü nüngdak, ta lenir anati bangjema liasü," ta Vatican sangdong ajanga metetdaksü. Anogo ishika tejaklen Pope Francis-i Vatican nung nativity scene anasa sarasadema liasü.

Iba tesem nungji kinü tanur Yisu mejangba tesemji sü tanak aser temesüng agi meyibanga liasü; iba temaitsüji Palestine nungertemi Israel anema nokdakba lir. Iba noksa prokshiba sülen Holy See nung Israeli Embassy-i Arab nung temeyibangba süji agienang ta takhangba agütsü. Yaküm October 7 nü Hamas teloki Israel amakba sülen Israel-ia Gaza nung Hamas anema rara tenzük. Iba mapang nungjagi Pope Francis-i mapang shia Gaza nung yimjung atema jembir. September ita tatembanglena Pope Francis-i Israel-i Lebanon aser Gaza nung tashiyim amshiba atema aija liasü. Palestine Tir, Abbas-isa December 13 nü Rome nung Italy Ato kilonser Giorgia Meloni aser Tir Sergio Mattarella nata ajuruogo.

AO OSHI ANGAZÜKDAK: TANÜ ANGAZÜKTSÜBA OJANG



Tatementsü

(Adj) langka ka inyakba indang temeten aginüa tai kuli ashiba (excuse)

\* Pa shiranga sendeni marubaji tatementsü ka dang liasü.

Tatemzükba

(Adj) inyaksü ta lemtetba/nangzükba (make vow)

\* Asenoki tatemzükba mapabo shitak küma inyaksüla .

OLONG PAITEP # 7010

Grid for Olong Paitep # 7010 with numbers 1-22 and shaded cells.

TIPLÉN :

- 5. Ajunga - (4)
6. Tebur dang yamai ajar - (6)
8. \_ \_ \_ \_ ngshi - (4)
10. Tsüngküm ozü ka - (3)
11. Aika / Perir anüng - (6)
13. Süngjang tako ka - (5)
15. Mechinüi aküm - (6)
17. Odaktsü - (3)
19. Agütsüba memeshi - (4)
21. Tesütep / Apet - (6)
22. Tetsür tenbenjem mapang - (4)

LANGTSÜNGLEN :

- 1. Teyira - (5)
2. A \_ \_ \_ gsang - (3)
3. Arua mali / Matong - (4)
4. Tema tereprangtsu - (4)
7. Onsara / Alia - (4)
8. Tulu masü - (4)
9. Yimya-yimpong - (5)
12. Ak alidak - (4)
14. Yangi masü - (4)
16. Kaket shilem ka - (5)
18. Ayak aketba shiruru - (4)
19. Meru \_ \_ \_ \_ - (4)
20. Kidongren telemsa - (3)

OLONG PAITEP # 7009 TELANGZÜBA

TIPLÉN :

- 1. Tanga, 6. Wara, 7. Rajang,
9. Anük, 10. Jenjang, 11. Alar,
14. Ngashi, 15. Nala, 16. Mechi.

LANGTSÜNGLEN :

- 2. Anga, 3. Yabang, 4. Tarok, 5. Orak,
8. Ainer, 9. Anema, 10. Jabili,
11. Among, 12. Miim, 13. Anem.

NAI-A YA METETTER MA



Toyota-i yanglutetba 'basketball playing humanoid robot' ajanga maneni Guinness World Record ka yangluogo. Toyota-i yangluba Humanoid Robot-i Farthest Basketball Shot atema otsü yanglu aser ibaji 24.55 meters (80 feet and 6 inches) lir. 2019 nunga Humanoid Robot-i Most Consecutive Basketball Free Throws (2,020) atema Guinness World Record ka yangluteta liasü.

Manipur CM Biren Singh-i "Monuments of Ages" sayatsü



Imphal, December 13, 2024

(Agencies): Chief Minister N. Biren Singh-i Kamjong district kübok Chadong yimtsüng "Monuments of Ages" lapoktsüogo.

Iba sentong ya Manipur Indigenous People's Cultural Exchange Festival nung shilem ka aser "Manipur United by Diversity" omen nung ajemdaker agiogo.

Anogo ananü benjung ya Tourism Department kübok Indigenous People's Forum-i ayongzük aser Manipur nung recognized tribes 35 sobaliba senmang atema benjungteper.

Iba sentong nung Chief Minister Biren-i nüngshilung aika sayatsü aser sobaliba osettem aser local products

ayokba stalls sema senzü.

Iba benjung nungsa kin balalai yartsüngsang aser ken balala ajanga sobaliba shilem agia liasü.

"Iba tesem nung tzünokdang yangluba ajanga tajangzük angutsü aser iba ajanga fishing o tourism atema maongkatem bentsür aruogo" ta Biren Singh-i ashi.

Chadong nungeri state ajungtsü mechi tesem tangaleni belenba atema kanga pelar ta paisa ashi.

Indigenous People's Forum-i iba ama tongtipang sobaliba lemsatepba benjung ayongzükba atema tenüngsang agütsür ta Biren-isa ashi.

"State sorkari Manipur nung temzüngtem ajanga lisopurtem

wazüka aser kümzüka ayutsü meranger. Ajisüaka nisung kari iba mapa lutsür saka state sorkari maneni lisopurtem atema inyaksü" ta pai metetdaksü.

"Manipur ya lisopurtem atema lir. Asen oboula nungeri noklang nok aser nü amer asen lima kümzüka aru. Sorkari kechi südir süaka lisopurtem kümzüka ayutsü" ta CM Biren-isa metetdaksü.

Iba sentong nung Works Minister Govindas Konthoujam, CAF & PD Minister Leishangthem Susindro Meitei, Animal Husbandry and Veterinary Minister Kashim Vashum, aser tongti sorkar ketdangsurtem aden.

Dibrugarh University & ICFRE tsüngda MoU nung sign sütep

Dibrugarh, December 13, 2024 (Agencies): Dibrugarh University aser Indian Council of Forestry Research and Education's Rain Forest Research Institute, Jorhat tsüngda Memorandum of Understanding (MoU) ka nung sign sütepogo.

Iba MoU ya Northeast India nung natural resource utilization atema research aser initiatives atema lir.

Dibrugarh University Vice-Chancellor Professor Jiten Hazarika lia MoU nung sign sütepogo.

University nung Registrar in

charge Dr. Prasanta Kumar Kakoty aser ICFRE-Rain Forest Research Institute nung Director Dr. Nitin Kulkarni nati MoU sign sütepogo.

Iba tesentaktep ya climate change, plant technology, aser sustainable forestry practices atema lir.

Smart India Hackathon nung Guwahati kaketshirtemi takok angu

Guwahati, December 13, 2024 (Agencies): Guwahati nung Girijananda Chowdhury University nungi kaketshir telok kati Smart India Hackathon 2024 Final Round nung mezüngbuba jenjang takok nguogo.

Kaketshirtem ya Department of Computer Science & Engineering and Department of Computer Applications nungi liasü.

Kaketshir tenet agi akümba telokji "Terabyte" lir aser parnok ya Akash Bora, Sankhyahrick Swami, Rishav Kumar Singh, Indrajeet Kr Singh, Shaptarshi Debnath, Anshu Kumar, aser mentor Adarsh Pradhan nunger lir.

Parnoki Conversational Image Recognition Chatbot solution ka yanglutetba atema tetendangertemi kanga sakloka liasü.

AICTE Smart India Hackathon (SIH) 2024 ya December 11 aser 12 anogotem Prin L. N. Welingkar Institute of Management Development and Research, Mumbai nung ayongzüka agia liasü.



Smart India Hackathon nung telok 49,892 aser kaketshir 2,99,352-i shilem agiogo.

Northeast nungi telok pezüi SIH-2024 aser GCU software

edition atema tetushi agüja liasü. Smart India Hackathon ya kümshia All India Council for Technical Education (AICTE)-i ayongzüka agir.

AO YOUTH FORUM DIPHUPAR

Raffle Draw Result (In aid of culture connect)

Date : 13.12.2024 Time : 5:00 PM

1st Prize : Ticket No - 2319

2nd Prize : Ticket No - 1127

3rd Prize : Ticket No - 2517

Consolation Prize : Ticket No - 0832, 2496, 1102, 0933, 0288, 0689, 0846, 2084, 2629, 0572, 0987, 1715, 2045, 0522, 1651, 0107, 0999, 2379, 1515, 2305, 0686, 2068, 1781, 2731, 0811, 1551, 2004, 1434, 0957, 2787, 1822, 0411, 1333, 2310, 2929, 1833, 2077, 1610, 0744, 0320, 2984, 1683, 0684, 0088, 0225, 2177, 1958, 0030, 2050, 2053.

Office Of The

**KELINGMEN SENSO MUNG DANG**

Hq. - Kelingmen, PO. Changtongya- 798613. Dist. Mkg

**Tenüngsang Agütsür**

Mr. Nungsangliba S/o Mr. Imkongchuba Aser Mrs. Nukenmenla tena jabaso Assistant Mechanical Engineer (Class-1 Gazetted) post under works & Housing Department exam NPSC CTSE, 2024 tatidang nung jenjang tajungtiba nguteta kelingmen senso nem konang nüngsang tulu bener arutsüba asoshi sensosanger ajaki pelaba den tenüngsang agütsür.

Tsüngremi nü wadang nung maneni temoatsü süa len aniang ta sensosanger ajak sarasadem.

Sd/-  
**(T. Supong Jamir)**  
KSM President

Sd/-  
**(I. Bendang Jamir)**  
KSM Secretary

**KHU-KHUA AITSÜR**

Satsü yimtak Mr. Moatemjen Imchen-i (S/o Lt. Toshikaba Imchen), kijung lanutsür ka taküm tashiyim agi raksatsüba osang angashia Mangmetong Watsü Telen-i khu-khua aitsür. Aibelener mapa yari temerenshi agüjang ta sangoktsür.

Sd/-  
**Tareplila Pongen**  
President, MWT

Sd/-  
**Moarenla Jamir**  
Secretary, MWT

**Trump inauguration nung China Tir Xi Jinping jaok**



**Washington, Luchii/ December 13 (Agencies):** US tir inyaktsü shima alisang Donald Trump-i Beijing den tali tokteptsü nangzüka pa indang Cabinet nung China anemer shima liaka January 20 nü pa indang inauguration nung adentsü China Tir Xi Jinping jaok ta osang balala ajanga ashir.

Election agir mapang tatsüka lir Trump-i November ita tetenzüklen Xi jaok ta item osangtem ajanga ashir, ajisüaka China tiri iba tejaokba ya agizük asü masüar ano mejangja. Washington nung aliba Chinese embassy atema odongtar-ia kecha shia mali.

January 20, 2025 nü Trump tenangzükba agiba sentong nung bendanger tongtipang nisungtem adentsü asoshi terenemshiba mapang ka lir. Hungary Ato Kilonser Viktor Orban, shiba Trump den tesendaktep tajung lir aser tan hopta Mar-a-Lago nung pa semdang, pa tang tashi adentsü asü masü ta asadangba mapang lir, ta pa indang sentong meteter kari ashi.

“Alima nung lenirtem Tir Trump den ajuruteptsü renema lir, kechiaser pa yakta yimsüsüba mendeni arutsü aser America nung tashi amshia alima tesem ajunga nung yimjung tanaben bener arutsü ta parnoki meteta lir,” ta Trump transition odongtar Karoline Leavitt-i ashi.

Trump-i bendanger lenirtem jaokba ya kodanga meinyakdangba ka lir, kechiaser 1874 nungi US State Department indang records tem nung yimten tashi melenoktsüba sentong nung bendanger lenir adenba mali, saka ambassadors

asera danga diplomats tem iba sentong nung adentsübo jaoker. US geopolitical tsütsü meputepi aliba linük, China indang lenir ka America tir shimba nung adentsü ya tesüba mapang kodanga matalok. Ajisüaka Trump-i tawa sensaksem ka nung pai Xi den jembiogo aser tena junga angatettepa lir ta ashi.

Ajisüaka Trump ya Xi'er sorkar anemer tejangja ka lir. Pa indang 'inner circle' tem Beijing anemer dang lir aser Trump-i China anemertem pa indang cabinet nung shima lir, aser item rongnung Marco Rubio ya Secretary of State aser Mike Waltz ya National Security Adviser inyaktsü shima lir.

Temesepba narcotic fentanyl shibelenba anentsü asoshi Beijing-i mera magira China nung osettsüset nung saru talila shilem 10 meshitsü ta US tir inyaktsü shima alisangi nangzüka lir. Pai nübuyimba mapanga China nung oset nung tariff shilem 60 dak tema meshitsü amokmerena lir. US-isa January 19 tashinung TikTok indang parent company ByteDance dang iba social media app ayoktsü anogo latetja lir, aser aji mesüra iba app ya America nung nokdangtsü.

Taoba ita sorkar meyong Chinese media ajanga Trump dang fentanyl mechi China nung osettsüset nung tariffs tali meshitsü nangzüka aliba ajanga alima nung tematiba economy ana ya teraksa aliba tariff rara-i atsür aotsü ta tekumandangtsü shia lir. Ajisüaka Xi-i Beijing ya US den tesendaktep tajung nung lidaktsüner ta China indang US envoy-i tawa shia liasü.

**US-i Ukraine nem sen \$500 million mitkar teyari agütsütsü**

**Washington, Luchii/ December 13 (Agencies):** United States Tir Joe Biden taruba küm tetenzüklen office metoktsüdang tatembangba teyari amai United States-i Ukraine nem mitkar teyari sen \$500 million agütsütsü.

Secretary of State Antony Blinken ajanga “significant package of urgently needed weapons and equipment” ya Brehostibarnü sangdong, kong High Mobility Artillery Rocket Systems, ammunition, drones aser armoured vehicles tem dena alitsü.

Taoba ita US tir election nung Donald Trump-i takok anguba ajanga Ukraine nem US military aid agütsüba kanga ajemtsü akok, aser iba yongji tang ketdangtsür tem sen dollar billion aika arangtepa agütsür.

Ita tetenzüklen security assistance package sen \$988 million aser weapons package sen \$725 million agütsütsü sangdonger lia tang teyari tasenba ya agütsür.

Brehostibarnü teyari sülen ya ano Biden-i US stocks nungi congress temelaba magie Presidential Drawdown Authority nungi sen \$5.6 billion shi amshitetsüsa anünger.

Biden-i maneni iba

administration matem tashi teyari agütsütsü, ta National Security odongtar John Kirby-i Brehostibarnü ashi.

Iba teyari ya rara nung kangadang tongtipang mapang ka nung agütsür, kechiaser Moscow indang sepaitem ya ita aika rarar tang Ukraine indang Donetsk region kübok tongtipang Pokrovsk yimti anasai aoba mapang lir.

Russian sepaitemi yimti anasa Ukrainian positions aika raksatsüogo mesüra rakzükogo, ta Ukraine indang mitkar temi tawa ashi.

Pokrovsk ya agidaktsüra, ita aika tsüngta Ukraine mitkar asoshi takoksa tulutiba alitsü, koba Ukraine mitkar atema tongtipang logistics centre ka lir.

Russia-i anepdang nüburtem mazüngi aliba mapang energy facilities nung missiles aser drones amshia amak, ta Ukraine indang air force ajanga Hokulbarnü ashi, aser power company Yasno-ia par indang consumers 3.5 million nungi tesadang ka shi power mali kumogo ta ashi.

US-i agütsüba long-range Army Tactical Missile System missiles amshia Ukraine-i tan hopta southern Rostov region

nung military airfield ka amakba tayang kepzüka amak – taküm power grid 12 ben buba amakba alitsü – ta Russian defence ministry ajanga Hokulbarnü ashi.

Kasa mapang Poland Ato Kilonser Donald Tusk-i Brehostibarnü ashiba agi, ceasefire alitsüsa asünungbo bendanger sepaitem Ukraine nung anenzüktsü atema pai France Tir Emmanuel macron den jembiogo.

Warsaw semdangba mapang Macron-i Ukraine nung Russia indang rara nungi ainshitsü lenmang ka bushitsü shia liasü, koba Kyiv aser European Union tejangraba lir aser Ukraine indang sovereignty aser EU indang security lendongbang nung lir ta ashi.

“Peacekeeping missions atema asenoki Ukraine nung yimjung nungdaker,” ta EU foreign policy chief Kaja Kallas-i Brehostibarnü ashi.

“Iba atema Russia-i amakba anentsüla, koba parnoki meinyaker,” ta lai Berlin nung foreign minister tem den senden ka mamandang ashi.

“Aji masüdag asenoki jembitsü kecha mali.”

**Iran nung hijab ozüng tesashi amshi tenzükter**



**Tehran, Luchii/December 13 (Agencies):** Iran nung hijab ozüng sülen manidakba tetsürtem nem tasüba temerenshi agütsütsü mesüra tepuokdak küm 15 tashi ayutsü ozüng tesashi aser tasen benokogo. Ozüng tasenba ya “culture of chastity and hijab” mapa kuma inyaktsü nükjidong nung lir, kong meshidaki sübosolemba, abensüoshi magiba mesüra veil anema nokdangba asoshi temerenshi tulu lir.

Iran indang ozüng tasenba nung Article 60 kübok aibelener dang senchi achitsü, süng agi azüktsü mesüra mapang talanglang tepuokdak ayutsü. Maneni aibelener tem tepuokdak küm 15 tashi ayutsü, mesüra “corruption on earth” mechi tasüba

temerenshia agütsütsü. Item tangatetba foreign mesüra lokti tentet dang sayuba nung aitsür tem tepuokdak küm ter tashi ayutsü aser senchi sen £12,500 tashi alitsü.

Iba den külemi aputsü mesüra ozüng nung aibelener merenshiba nokdangtsü meranger tema tepuokdak ayutsü mesüra senchi achitsü, ta The Indian Express ajanga ashi.

Iran nung tetsürtem ya 1979 Islamic Revolution mapang nungi parnok kou meyibangtsü ozüng liasü. Ozüng tasenba ya arishi küm 22 tain Kurdish tsür Mahsa Amini police ket nung September 16, 2022 nung sür tesem ajungalen longkak aiter küm ana lir benoker. Lai iba

linük indang dress code nung aibelenba yong morality police temi Tehran nung apu.

La asüba ajanga linük tesem ajungalen longkak aita security personnel tem densema nisung noklang aika takum sama. Iba mapang longkak aiter nisung meyrirjang aika apu.

Ozüng tasenba ya Amnesty International ajanga kanga sashia aitsür, koba ajanga tesunep nung yimsüsür anemer nisung tamajung kumtsür aser tetsür temeden rakzükter ta ashir.

Linük nung dress code sülen manidakba tetsürtem asoshi “hijab clinics” amenoktsü sentong lir ta Iran ketdangtsür temi sangdongba ajanga nüburtem tali jashitepdaktsü.

## Australian Open 2025 atema Stan Wawrinka nem wildcard agütsü



**Melbourne, Luchii/December 13 (Agencies):** Asembeben Grand Slam champion bena aloisang Stan Wawrinka nem Australian Open atema Hokulbarnü wildcard agütsüogo, aser iba asayamung

nung pai mezüngbuba asayaba ya küm 20 shi jakdang liasü. Swiss nunger arishi küm 39 tain Wawrinka-i iba asayamung title ya 2014 küm Melbourne Park nung Rafael Nadal madak takok ngua aben.

Ibaji pa asoshi Grand Slam takok mezüngbuba liasü aser iba takok sülen pa tajungdang world number 3 atong aser ano 2015 küm Roland Garros takok aser küm ka lir US Open asayamung takok ngua liasü.

“2025 nung Australian Open asayatsü atema wildcard anguba asoshi kangasa pelar,” ta Wawrinka-i ashi, shiba küm ishika temang yirua tennis asayamung nung shilem magiteti arur.

“Melbourne ya kü mulungjang nung teti lir – yangi ni mezüngbuba Grand Slam takok angu aser ibaji kü indang career nung alizüng tulutiba rongnung ka lir.”

Kasa mapang Daria Saville aser Ajla Tomljanovic densema Australia nunger nisung ti nem wildcards agüja lir.

China nunger asayar tejen Zhang Shuai aser Thailand nunger Kasidit Samrej nungera Asia-Pacific playoff akokba sülen wildcard agütsü.

2025 atema mezüngbuba Grand Slam ya January 12-26 anogotem asayatsü lir.

## 2026 FIFA World Cup atema European Qualifying Groups sangdongogo

**Zurich, Luchii/December 13 (Agencies):** England coach ama Thomas Tuchel asoshi mezüngbuba mapa ya Hokulbarnü par team tasenba 2026 World Cup qualifying group Serbia, Albania, Latvia aser Andorra den ataba ya alitsü.

Tuchel mapa January ita nungi 1966 World Cup takok angur indang German coach mezüngbuba ama inyak tenzüksü, saka Hokulbarnü pa FIFA headquarters nung European team 54 qualifying groups 12 nung lemsaba reprangi ao.

Team pongu aliba groups asaya ya March ita tenzüksü, saka England ama team pezü aliba groups tem September ita nungi asaya tenzüksü.

Team 48 aliba World Cup mezüngbuba nung Europe nungi team 16 aotsü, koba United States, Canada aser Mexico linüktem nung asayatsü lir. November ita group 12 takokertem ya indang-indanga qualify asütsü aser runner-up ya March 2026 nung playoff asayatsü aser yangji taoba ita Nations League group akokba team pezü adentsü.

Temaba jenjang nung aliba team ishikati qualifying opponents meteta lir, aser item rongnung England ya ka lir. Groups timba tang tashi merenem, kechiaser March ita Nations League quarterfinals asayatsü aliba nung ajemdaker

temaba jenjang nung aliba team ti lemsatsü.

European champion Spain aser Netherlands tsüngta quarterfinal asayaba nung takok angur ya Turkey, Georgia aser Bulgaria aliba Group E nung adentsü.

March ita France aser Croatia tsüngta asayaba nung takok angur ya Group D nung adentsü, kong Ukraine, Iceland aser Azerbaijan lir. Nations League quarterfinal nung tamakok ajurur ya team pongu aliba Group L nung Czech Republic, Montenegro, Faeroe Islands aser Gibraltar den adentsü.

March ita asayaba nung Germany yagi Itali madak takok ngura, parnok ya Group A nung Slovakia, Northern Ireland, Luxembourg den adentsü. Iba asaya nung tamakok ajurur ya Group I nung Erling Haaland'er Norway, Israel, Estonia aser Moldova den adentsü.

June ita Nations League Final Four atongba team pezü ya September ita tashi World Cup qualifying masayatetsü aser parnok ya team pezü aliba groups nung asayatsü.

Hokulbarnü draw aliba nung Russia maden, kechiaser par team ya February 2022 nungi tenzüka par mitkari Ukraine amakba ajanga FIFA aser UEFA ajanga international competitions nung tenokdangba agüja lir.

2026 FIFA World Cup atema

European Qualifying Groups yamai alitsü:

**Group A:** Germany or Italy (winner of Nations League QF), Slovakia, Northern Ireland, Luxembourg.

**Group B:** Switzerland, Sweden, Slovenia, Kosovo.

**Group C:** Portugal or Denmark (loser of Nations League QF), Greece, Scotland, Belarus.

**Group D:** France or Croatia (winner of Nations League QF), Ukraine, Iceland, Azerbaijan.

**Group E:** Spain or Netherlands (winner of Nations League QF), Turkey, Georgia, Bulgaria.

**Group F:** Portugal or Denmark (winner of Nations League QF), Hungary, Ireland, Armenia.

**Group G:** Spain or Netherlands (loser of Nations League QF), Poland, Finland, Lithuania, Malta.

**Group H:** Austria, Romania, Bosnia-Herzegovina, Cyprus, San Marino.

**Group I:** Germany or Italy (loser of Nations League QF), Norway, Israel, Estonia, Moldova.

**Group J:** Belgium, Wales, North Macedonia, Kazakhstan, Liechtenstein.

**Group K:** England, Serbia, Albania, Latvia, Andorra.

**Group L:** France or Croatia (loser of Nations League QF), Czech Republic, Montenegro, Faeroe Islands, Gibraltar.

## Tesüiba China national football team coach Li Tie küm 20 tepuokdak ayutsü



**Beijing, Luchii/December 13 (Agencies):** Taoba mapang Chinese national football team coach inyaka alisang aser mapang ka English Premier League nung Everton Football Club asoshi asayasang Li Tie ya sübokrem agiba nung aika küm 20 tepuokdak ayutsü obendang agütsüogo.

Sübokrem agiba aser agütsüba dak sendakba aibelen mapa inyakba kuli ngutetba sülen pa nem Hubei province nung aliba court kati Hokulbarnü iba obendang ya agütsü.

Court ajanga ashiba agi, ochimashi mapa inyaker bushia apuba maparen nung saisaponger rongnungi arishi küm 47 tain Li Tie ya tenüng tulutiba alitsü aser 2015 aser 2021 tsüngta pai sen 120 million yuan (\$16.5m) jenjang sübokrem mapa inyak, aser iba mapang pa national coach ama küm ana inyakba liasü.

Li yagi March ita court nung aibelenba nangzük, saka aji masüdag national coach inyaktsü aser January ita CCTV broadcaster ajanga documentary ka sayuba nung Chinese Super League matches fixing atema sübokrem sen \$421,000 jungnüa amshiba nangzükler liasü.

Mapa tamajung inyaker südi ta temulung melemi alirtem okadaki maodang tatok nangzükba CCTV ajanga mapang shia sayur, aser iba yimya ya rights groups temi

kanga aitsür.

1990s tatemlen nungi China nunger football nung match-fixing aser ochimashi agi sünga liasü aser ochimashi aliba ajanga national team junga masayateter ta fans temi tenüng asener.

Tir Xi Jinping-i anticorruption campaign tenzüka ajanga taoba Chinese Football Association (CFA) tekolakba Chen Xuyuan ya sübokrem sen 81 million yuan (\$11m) jenjang agiba atema küm tetenzüklen takum tepiyong tepuokdak ayutsü obendang agütsü.

Iba inyakim nung shilem ka ama ano taküm football ketdangsür aika ita 30 nungi küm 14 tashi tepuokdaki yoka lir.

Match-fixing aser sen sayiba indang küm ana bushisüngdangba sülen September ita CFA ajanga asayar 38 aser club ketdangsür pongu takum tepiyong football masayatsü tenokdangba September ita agüja liasü.

Bushisüngdangba mapang asaya 120 nung ochimashi inyak aser yangji football clubs 41 dena lir ta ngutet.

Xi ya football fan ka lir, shiba künü anogo China nem World Cup ayongzuka takok ngudaktsüner, saka tebur indang national team yagi jangratema masayateter.

FIFA indang ranking nung China ya alima nung jenjang 90 buba nung lir, koba Caribbean asetkong tila, Curacao dang jenjang ka agi temaba lir.

## INDIA OSANG : Tapak 3 nungi...

### Lok Sabha nung tang mezüng...

Priyanka-isa, sorkari kakettem aser onüktem nungi Nehru tenüng aidoktsü meranger, ajisüaka linük nüchiso aser linük yangerba nung Nehru-i shilem tulu agibaji kodanga maidoktetsü, ta ashi.

Laisa, BJP-i linük temzüng melenshitsu merangla, ajisüaka taküm Lok Sabha election nung parnoki menden peria mengutetba ajanga parnok tebilemba nokdang, ta ashi.

Ato kilonser Modi aija, Wayanad nungi MP, Priyanka-isa, pai linük temzüng

tsüngdang aiben mokremer, ajisüaka Sambhal, Hathras aser Manipur nungi ochi temeden atema ayimdenba olatem pai sendoker, ta aitsü.

Ato kilonser Modi maneni aija Priyanka-i, “Chuba kati sensaker ama sübor market nung nemzua nüburtem timtem aser tebilemba angadanga senzuba otsü ajaki angashia lir. Ajisüaka tanübo chubai süoshi tajung dang melentepa aginer saka nüburtem matsüngdangi oa parnok timtem aser tebilemba angadangtsü memelunger,” ta ashi.

## BILEMDANGANG

“Kecha memetetba ya tajungtiba.”